

## ХАЛАДЖАСН МАЛАН СÄÄНÄР ТАРГЪЛУЛДЖАНА

Запади района 112-ч номертә совхозд малч болдж Стерлев Федор, Федоров Василий, Бутурлакин болн Камынин кӧдлдж йовцхана. Эдн бӱрӱс, гунджд хәрүлджәцхәнә. Сән идгәр хәрүлдж, цаглань усар тетгдж йовсн деерәс малнь йир сәәнәр мах бәрдж, ясрдж йовна.

Зургъан сарин хәрүллгәнә кимджәнд дундлад нег толгъа мал өдртән 950 грамм өсдж. Улгүрлхд, үр Стерлев Федор 171 толгъа мал хәрүлдж йовна. Тер малан килмджән өгәд хәрүлсн учрар, июнь сард дундлад нег толгъа мал 1120 грамм өслт өгч. Бутурлакин 237 толгъа мал хәрүлдж йовна, тер мал болгънас дундлад өдр болгън 1157 грамм өслт авб.

Дундлад өдр болгън нег толгъа малас 700 грамм өслт авх зурата бәәдж, тер зурагъан давулдж күцәхин кергт малан сән идгәр хәрүлдж, услдж йо-

всн учрар Стерлев Федор, Бутурлакин, Федоров болн Камынин хәрүлдж йовх малас иим ик өслт авч йовцхана.

Махнд орулдж өгх малиг шу лугъар таргълулхин кергт, идгин газриг кесг анъг таслдж дара-дарагъарнь олзлдж, малмудиг сәәнәр таргълулджана.

Эн кӧдлмшт селәнә эдл-ахун специалистир болн малчир үнн сән седклән өгәд хәләдж, таргън малмуд государствд өгчәнә.

Эн мал хәләдж йовх үүрмүд Стерлев, Федоров, Бутурлакин болн Камынин дундан социалистическ дӧрлдә өргнәр делгрүлдж йовцхана. Тегәд хәрүлдж йовх малин өслтнь ик болджана. Сарин чилгчәр чинънүрддж, тер дигинь ведомостьд бичдж, тер чинънүрин то-дигәр малчирт сара джалвинь өгнә. Эн деер келгдсн малчир сардан 1300—1500 арслнъ мӧнъг олджана.

А. Д.